



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma : Tir Yimiyim

tiryimiyim@aolima

tir yimiyim

TAPAK 8

Sorkari inyaktetba tulutibaji sensaker cr. 60 ajungkettsüba lir: Amit Shah

Pakistan indang taoba PM Imran Khan anema ken o tasen benok



VOL. XXI NO. 17 (ADOK 17) DIMAPUR RASEMNÜ (WEDNESDAY) MONGPUTENI (OCTOBER) 25, 2023 ₹ 5.00

Nagaland BJP tiri PDA co-chair inyaktüsü

Dimapur, October 24, 2023 (TYO): Bharatiya Janata Party (BJP) Nagaland unit nung tiri People's Democratic Alliance (PDA) coordination committee nung co-chairman inyaktüsü shimogo.

“Benjamin Yepthomi-i PDA coordination committee nung co-chairman inyaktüsü atema Nagaland Governor-i pelashishia shimer” ta chief secretary J Alam-i Hombarnü sangdong ka nung metetdaksü.

Benjamin Yepthomi ya cabinet minister jenjang nung shimer, ta paisa ashi.

September 25 nü Benjamin-i Minister Temjen Imna Along ket nungi Nagaland state BJP tir mapa melenzüka liasü.

BJP Nagaland ketdangpur tasen shim:

BJP Nagaland State Unit-i ketdangpur tasentem shimogo

asera iba ya BJP national President JP Nadda-ia mulunga agizükogo. State vice presidents: Kropol Vitse, Basu Damani, S. Phangnon Konyak, Hurui Zeliang, Yankithung Yanthan, H Haiying

State general secretaries: Sunep C Jamir, Manai Konyak General Secretary (ORG): Abhay Giri

State secretaries: Melandiauliu, Easter Chang, Shilukaba Kongchar, Vechita, Tafi Snock, Aliba Sangtam

State treasurer: Mahesh Kotecha Office secretary: P Kavili Achumi Mahila Morcha: Shanbeni Yuva Morcha: Hinoka ST Morcha: Tsachola Sangtam Kisan Morcha: Er. Cheong Konyak

OBC Morcha: Prabhakar Yadav Minority Morcha: Ankit Jain

NSF-i ILP akangkanga inyaktüsü ayongzüker

Dimapur, October 24, 2023 (Agencies): Naga Students Federation (NSF)-i Nagaland sorkar dang Nagaland nung aser talisa Dimapur district nung inner line permit (ILP) akangkanga inyaktüsü ayongzüker.

“Tesüba küm 60 tema ILP maparen inyaka aruba nung metokmeperi liasü. Item ajanga ozüng alema arurtem teimba kumdaksü aser iba ajanga lisopurtem maitsü aser sobaliba asoshi lendong bentsür aruogo” ta NSF president Medovi Rhi aser general secretary Chumben Khuvung nati ashi.

Dimapur railway station aser Dimapur airport nung ILP cells lapoktsüla kechiyong item ya Nagaland indang primary entry points lir, ta NSF-i ashi.

Parnokisa Nagaland nung entry aser exit points ajak nung ILP monitoring cells lapoktsü takhangba agütsü.

“Küm aika NSF-i federating units den külemi district aika

nung ILP holders jangjaba mapa inyaka arur. Nagaland nung ILP mapa shitak meinyakba ajanga ozüng alema arurtem onsara kumdaksüogo aser iba ajanga lisopurtem asoshi lendong bentsür arutsüsa kümogo” ta NSF-isa metetdaksü.

Dimapur district nung ILP maparen aser Bengal Eastern Frontier Regulation (BERF) 1873 mapa shitak meinyakba ajanga nisungtem maneni ozüng alema arur. Dimapur nung nütsüng yongsük aika ketnung kulikaket tejanga mali lir. Maitsü shitak memetetba nisungtem ajanga Dimapur nung dang masü saka Nagaland aser Northeast nung timtem bentsür arutsü, ta NSF-isa ashi.

“Asen maitsü aser sobaliba kümzüka ayutsüla kechiyong samaa aotsü ana nung lir. Nagaland ali tila ka dang aser nütsüng yongsük ishika dang anungji asen lima nung asenok refugee akümsü kecha meteta mali” ta NSF-isa metetdaksüogo.

Advisor Mannen-i Longkumtoshi Pongen nüngshilung sayatsü

Dimapur, October 24, 2023 (TYO): October 24, 2023 nü Law & Justice, Land Revenue Advisor TN Mannen IAS (Retd)-i Longkhum yimtsüng nung monument hall cum watch tower lapoktsüogo.

Pongen Salang nung Advisor TN Mannen-i Longkumtoshi Pongen monument hall cum watch tower lapoktsü.

Tesüba nung aser tanü-a Longkhum nungi nübo tajung aika adoka Naga loktiliba asoshi inyaka aruba atema tenüngsang agütsür ta TN Mannen-i ashi.

“Nokrang rara nung nokingketer Longkumtoshi Pongen-i anir takok tulu anguba ama Pongener kidong nungi

tebur aser tetsürtemi Ao longjemtsü asoshi tongti shilem agütsü ayongzüker” ta paisa ashi.

Paisa kidong aser yimtsüngtem telongjem nung alitsü ayongzüker. “Asenoki politics tangatetba balala aser pei asoshi dang bilemra tejakleni maotsü” ta Advisor Mannen-isa ashi.

LBA Pastor Rev. T. Aka Jamir-i memorial hall cum watch tower meshiteta sarasadem, Tongpok Pongen (Tatar) Guru T. Bendangwati Pongen-i Longkumtoshi Pongen indang otsü tatsü agi lemsatet aser Longkhum Council Chairman C. Angang-i tesentepertem pelaa agizük.

CM Neiphiu Rio-i YTC Platinum Jubilee nung aden



Dimapur, October 24, 2023 (TYO): October 24, 2023 nü Chief Minister Neiphiu Rio-i Yimkhiung Tribal Council (YTC) küm 75 ajungba jubilee mong nung denogo.

“Küm 75 Platinum Jubilee benjungmong nung Yimkhiung Tribal Council aser Yimkhiung nung nem tenüngsang agütsür. Shamator ya district tasen ka lir anungji nübortem longjemer district renloksü aser tejakleni aotsü atema longjemtsüla” ta CM Rio-i ashi.

District shia nung sorkar college ka alitsüla aser iba atema sorkari Shamator nung college ka lapoktsü atema mapa inyadkar ta pai ashi.

“Paisa nübortem dang Chief Minister’s Health Insurance Scheme (CMHIS) kübok angati

medical treatment tajangzük agütsüla. Maneni micro loan scheme kübok sensotemi Rs. 50 lakhs tashi sen apütsü akok” ta Rio-isa ashi.

Iba benjung nung CM Neiphiu Rio-i Jubilee Monolith sayatsüba sülen YBBA Executive Secretary Rev. Dr. S.J. Akhum-i meshiteta sarasademtsü.

CM Rio-isa video conferencing ajanga Sangphur nungi Soil colony Shamator tashi NEFA Road lapoktsü. Iba lenmang ya 2023-24 nung SASCI (State) kübok yanglu.

Sentong nungsa President Tenyimi Union, Nagaland; President CNTC, President ENPO, Jubilee Host Youth Resources & Sports Advisor S. Keoshu Yimkhiung nungeri o jembi.

“Celebrating Togetherness” omen nung ajemdaker amongba benjung nung Rural Development and SIRD Minister Metsubo Jamir; Power, and Parliamentary Affairs Minister K.G. Kenye aser Advisor to Chief Minister Dr. Chumben Murry nung aden.

Iba benjungmong host ji Youth Resources & Sports Advisor Keoshu aser Fire & Emergency Services, Home Guards & Civil Defence, Relief & Rehabilitation Advisor S. Kiusemew na liasü.

Yimkhiung Tribal Council (YTC) ya January 1, 1948 nü Huker Village nung tenzük.

Iba mapang asür P. Hopong Ang sessional chairman aser General Secretary K. Zungkum na lenisüba kübok tenzük.

Jemtimenba Mollier Foundation(JMF) Tetsü Oshi Nung Alakteta Takok Angurtem nem tetushi agütsü



Jemtimenba Mollier Foundation(JMF) Tetsü Oshi Nung Alakteta Takok Angurtem Tushiba Sentong agir kelen senpet agizükertem JMF pur Ao Senden lenirtem ase Ao Kaketshir Mungdang lenirtem külemi tangokba noksa.

Mokokchung, Mongputeni/October 24(TYO):Jemtimenba Mollier Foundation(JMF) Tetsü Oshi Nung Alakteta Takok Angurtem Tushiba Sentong tanu October 24 nü Ao Senden Conference Hall nung agiogo.

JMF-i küm ishika tejaklen nungi Nagaland Board of School Education ajanga agiba tatidang nung Class 10 aser Class 12 nung Ao Subject nung tematiba nung takok angurtem aser ano Ao Senden Literature Board aser Ao Riju ajanga agiba Arangtet tatidang nung tenren shia tematiba nung takok angurtem nem kuli kaket aser sen senpet aguja arur.

Alima Covid wara aliba ajanga Jemtimenba Mollier Foundation ajanga iba senpet ya küm ishika aguja maruba tanuangJemtimenba

Mollier Foundation(JMF) Tetsü Oshi Nung Alakteta Takok Angurtem 2020 nungi 2023 tashi nung takok angur senpet agizükertemji yamai liasü.

Class 10 nung senpet agizükertemji 2020 Toshisangla Clark Memorial Hr.Sec.School.Impur, 2021 küm Atula W.Mongro Nagaland Christian Residential School Mokokchung, 2022 küm Maokala Longchari Children School,Mokokchung 2022 küm Aosenla Mount Moriah School.Ungma, 2022 küm Tamsuyanger Clark Memorial Hr.Sec.School.Impur, 2022 küm lanukokla Town Higher Secondary School.Mokokchung, 2022 küm Moatila Clark Memorial Hr.Sec.School.Impur,

2023 küm Züluienla T.Jamir Queen Mary Higher Secondary School.Mokokchung aser 2023 küm Lensen Ozükum Clark Memorial Hr.Sec.School.Impur, ta liasü.

Class 12 nung senpet agizükertemji 2020 Süngiemnenla Mayangnokcha Govt. Higher Secondary School.Mokokchung, 2021 küm Imsüwaden Clark Memorial Hr.Sec.School.Impur, 2022 küm Alempongla Longchar Queen Mary Higher Secondary School.Mokokchung aser 2023 küm Nungtetmenla Jamir liasü.

Maneni ano Ao Senden Literature Board aser Ao Riju ajanga agiba Arangtet tatitang nunga tenren balala nung senpet agizükertem yamai liasü.

(Maneni tapak 2 nung...)

MDMAA ajanga Imkongmeren Sports Complex müreka amung



Mokokchung District Martial Art Association ketdangpurtemi anir MDMAA nung combat association balala nungi affiliate süa aliba züngsemtemi October 23, 2023 nü Imkongmeren Sports Complex, Mokokchung mürekba mapang tangokba noksa nung angur.

Dimapur, Mongputeni/Oct.

24 (TYO): Mokokchung District Martial Art Association (MDMAA) ajanga October 23, 2023 nü Imkongmeren Sports Complex, Mokokchung nung mürekmejuba aser süngdong atemba sentong ka ayongzüka liasü.

Iba sentong ya 'Defend our body against disease by keeping

our surrounding clean' omen nung ajemdaker ayongzüka nüburtem dang pei temeket müreka ayutsü osang sangoktsü aser ano benjong mapang arur asünung jila müreka ayutsü nükjidong nung iba maparen ya inyaka liasü.

Iba nübutok sentong nung MDMAA ketdangsür 30 shi den sensaktepa aliba Associations

tem nungia shilem agia liasü. MDMAA ya parent organization ka lir aser yangi discipline balala indang combat association toku tashi affiliate süa lir.

Iba sentong nung shilem agir ajak dang MDMAA ajanga pelaba lemsatop aser nüburtem dang jila müreka ayutsü ayongzüka liasü.

NSCN/GPRN (K) nungi telok ka NSCN dangi meyip

Dimapur, Mongputeni/Oct.

24 (TYO): NSCN indang General Secretary, Th. Muivah lenisüba kübok inyaktsü asoshi NSCN/GPRN(K) nungi Maj. General (Retd.) Angmei telok NSCN dangi meyipa arua liasü, ta NSCN/GPRN sangdong ka ajanga ashi.

Naga nunger yimtenren asoshi raraba telok zünger mezüngmai liaka parnoki Indo-

Naga yimten ken o tematiba nung anir jembisang NSCN General Secretary Th. Muivah lenisüba sülen asendenshir tenzüksü tejangraba aser molungtetba parnoki lemsa liasü, ta ashi.

NSCN/GPRN (K) nungi meyipa arurtemji yamai alitsü:

1. A.Khampei Opeiham, Kilonser, Center Executive Member, Chairman, Konyak

Region

2. CCM Lempha Wangsu
3. Leacy Aleam Wangnao
4. Leacy Langgam Wangsu
5. Capt. Nokngam Wangsu
6. 2nd Lieut. Aton Wangsu
7. Sgt. Maj. Apan Wangsa
8. Sgt. Phowang Konyak Wangsa
9. Corporal Wankap Wangsa
10. Corporal Aman Wangsa
11. Corporal Nahpan Wangnao

Jemtimenba Mollier Foundation (JMF)... (TAPAK 1 NUNGI...)

2021 küm Arantget Diploma tenren(ADT) nung Kajenmenla Jamir , 2021 küm Arantget Certificate Tenren nung Putusen, 2022 küm Arantget Diploma Tenren nung Rongsenlemla Pongen, 2023 küm Arantget Diploma Tenren nung Alisenla, 2022 küm Post Graduate Diploma Tenren nung Twazenla Jamir ta liasü.

Tanu iba senpet agutsüba sentong nung Sentong meraketsür District Education Officer Wt.Sentinenla-i tayongzüka o jembidang tetsü oshiji meimchir asoshi tamaisü kuli lir. Aor ajaki pei tetsü oshi renlokdahtsütsü asoshi Ao Senden,Ao Riju aser Jemtimenba Mollier Foundation teloki inyakba ama tuluka meinyaktetsüa akok, saka pei kidang, kima yimdong nung asen Aor tsüngda aser Aor adenshidak asen Ao oshi jembitsüla,kechiba süra tanu Kohima aser Dimapur asen ano Mokokchung nunga asen Aor kibong nung Nagamese timba jembir, itemji angudang kanga dang sasaa bilemer, kibong aika nung nung ano tsürabur aser tanur tsüngda engraji agi jembir tangar bendanger oshi jembibaji konang ka ama bilemer, saka ibaji asenoki jungjunga shisadangra asen tetsü oshi sama odaktsütsü

asoshi ongken tuluka nung rebanga ayutsü tua ayuba mesüka lir ta ashi.

Watsü Sentinenlaisa küm aika Ao Senden akhum kübok taoba mapang Ao Senden Literature Board ajanga aser tang Ao Riju ajanga asen tetsü Ao Oshi ajungketsü asoshi asa lendong balala atonga inyaka angudang kanga dang temelung achir, atangji parnoki asen Ao kin asoshi timtemjenti arema inyakba ajanga asen Ao kin asoshi jenjang tajung ka renema toktsürta tepelaba olen ka lemsatop.

Laisa Aor tetsü oshi tali dang ajungketa aotsü tangatetba nung mangdang tulu yur Jemtimenba Mollier Foundation ajanga sentong balala ayonga tetsü oshi sentong agiba aser tanu ama sentong agiba ya asen nünurtem asoshi temoatsü ulura, asenok ajak tenung nung iba Foundation nem tenunsang agutsüdi aser parnok foundation-i inyakba ajak nung Tsüngremi yariangta sarasademtsüdi ta tesentepertem den ayongzü

Oshi samara sobaliba samatsü, aji asünung asenoki asen sobaliba wazüka yutetsü asoshi asen oshi jembidi. tanubo asenoki zübazübaa dang nungjakoja ajak enraji aser

Tsüma oshi agi ajar, item nungjakoja tajungji asen Ao oshi agi tenung tajung lir sürnung mejababa ajanga item tenung tajungji sama odaktsür, aser ibaji asenok asoshi takoksa tulu lir, anungji asenok kanga dang kümdangtsüla nungtaker. Kechiaser shir kini pei tetsü oshi sentoker par kinji samatsü, alima nung kin aika pei nüburi pei tetsü oshi mejembiba ajanga par kinji samaba asenoki kanga dang junga meteta lir. Anungji asenoki asen Ao kin kümzüka yutetsü asoshi asen tetsü oshi mesentokli ta District Education Officer Sentinenlaisa tesentepertem ayongzüka liasü.

Sentong tenzüka Asso.Pastor MTBA Rev Sentimereni sarasadem, JM Mendenbuba Dr.Tali Imsong-i tarur pela agizüka jembir, JMF-i senpet agütsüba teratet JMF tezüluba W.I.Temjen Tzüdir-i rateta ashi, alakteta takok angurtem nem senpet JMF Züngsem Wb.Aso Imsong ajanga achaayanga agütsü aser tatem nung Tsüngrem nem tenunsang agüja Mkg.Compound Asso.Pastor Women Wt.Narola Lemtur-i sarasademba den JMF Züngsem Wb.Tiatemsü ketdangsüba nung iba sentong agi.

Mon Circle Union Kohima küm 25 jungogo

Kohima, Mongputeni/Oct. 24 (TYO): Mon Circle Union Kohima (MCUK) küm 25 ajungba Silver jubilee sentong October 24, 2023 nü State Academy Hall, Kohima nung "United Welfare" omen kübok munga liasü.

Iba sentong nung tongti tesemdanger Advisor, DUDA and Geology & Mining, W. Chingwang Konyak liasü.

Iba sentong nung jembidang MCUK ajanga mapa meranga inyakba aser bendanga agütsür tenzüka asoshi MCUK nem tenünsang agütsü aser ano alizüng tasen tongtetsü asoshi kasa tanüla nung inyaktsü ayongzüka liasü.

Pai sobaliba aser ayak wazüka ayutsü tongtipang ta ashi aser lokti dang kasa yimya amshitsü ajungshi. State yimtiba nung alirtem khuret tuluba lir, anungji item khuret den lirumedema alitsüla ta ashi.

Oshioeben aser sobaliba indang nung jembidang, state nung sobaliba tajungtem rongnung Konyak nunger sobaliba ya ka lir, anungji akhi mapang nungi amshia aruba ama akumtsübo aser telungjem wazüka ayutsüla, ta pai ajungshia liasü.

Pai tesüba mapang biletmeta jembidang, akhi mapang aser tanü-asüng medemdangtsü makok ta ashi aser tanen makai bendanga agütsür meranga inyaktsü ayongzüka aser pei nükjidong nung takok angutsüsa inyaktsü ashi.

Paisa lanurtem dang pei nem moatsüba shisatsü shidak

amshitsü ayongzüka liasü aser MCUK indang jubilee nungu kaket sayatsü.

MCUK tentetba otsü lesatepba mapang, iba union ya kibong tilaka ama züngsem ishikati June 7, 1998 nung asür Naobo Nyasa ya Union tir ka ama tenzüka aser iba mapang züngsemtem ya timba home guards, labourers aser kaketshirtem liasü aser ishika sorkar mapa nung Grade III aser IV inyaker liasü, ta MCUK Founding member Yashei Konyak-i ashi.

MCUK tenteter timtem aser tayongzüka balala ajangshia aruba indang pai lemsapet aser 2014 küm nungi ang union tashi itshia tajungba akum, ta pai ashi.

Union aintsü asoshi nüburtemi yariba atema pai pelaba lemsatop aser Union ano mera tasen agidang maneni yaritsü imlar, ta pai ashi.

Iba sentong nung President, Konyak Union Kohima, Angnyei; Chairperson, Nagaland State Commission for Women, Nginyeih Konyak aser Retired Secretary of Law & Justice Department, Ngamjok Konyak nungeria tepela o jembia liasü.

Iba sentong tenzüka MUCK tir Tongnyei Konyak-i pela agizüka o jembir, H Moba, Pastor, Konyak Baptist Bumeinok Kohima ajanga sarasadem.

Iba sentong nung menden Rachael aser Chinge liasü aser G Langphong, Jubilee Convenor ajanga melepzüng o jembia liasü.



Mokokchung, Mongputeni/October 24(TYO): Mangmetong Kaketshir Telongjem Mokokchung telen tanu October 24 nü küm 75 ajungba Jubilee bejungmong sentong "Tsüngchi Shisaluyimer" ta süba omen nung ajemdaker Mokokchung town hall nung kanga dang meraket keta agiogo. Tanu iba sentong nung tetushi tejaoker Hon'ble MLA & Advisor, Information & Public Relations, Sail&Water Conservation Govt. of Nagaland Wb.Imkong L.Imchen liasü aser Jubilee tongti o jembir Associate Pastor, Kohima Ao Baptist Arogo Wb.Imnazüla liasü. Tanu iba sentong nung Hon'ble MLA & Advisor Wb.Imkong L.Imchen-i jubilee nungo kaket sayatsüdag aser Associate Pastor Wb.Imnazüla-i tongti o jembidang tangokba noksa nung angur.

30th Alongtaki AC Congress Committee ketdangpur tasen shimogo

Dimapur, Mongputeni/Oct.

24 (TYO): 30th Alongtaki Assembly Constituency nung Congress Committee ketdangpur tasen shimba sentong ka October 23, 2023 nü Longchem Town nung kimen A Lendi Ao kidang agia liasü. A Lendi Ao ya constituency nung taoba mapang NDPP indang kimen liasü.

Constituency nung ketdangpurtem ya Chubatemsu, ACCC president aser Imtionen,

ACCC working president, tenati anir alitsü aser sentong nung tena nem mapa nunglokja liasü.

Parnok mapa nung aniokba sentong ya Watimongba Aier, President Mokokchung DCC lenisüba kübok agi, kong Ex-MLA aser vice president NPCC, Shaboh Konyak alakteta jaoker ama dena liasü. Iba sentong nung state kübok Congress party nungi lenirtem aser züngsemtem dena liasü.

युगाब्द ५१२५



October 24, 2023 nü Nagpur, Maharashtra nung RSS 'Vijaydashami Utsav' sentong nung Rashtriya Swayamsevak Sangh (RSS) tongti, Mohan Bhagwat, kentener Shankar Mahadevan aser tangartem tangokba noksa nung angur.

PM Modi-i Jordan Chuba den Israel-Hamas rara atema jembu

New Delhi, Mongputeni/ October 24 (Agencies): Hombarnü Ato kilonser, Narendra Modi-i phone ajanga Jordan Chuba, Abdullah II den tang Israel aser Hamas na tsüingda raraba tensa atema jembuigo.

Ato kilonser Modi-i kiralongra, rara aser civilian aika asüba atema tebilemtsü akaba lemsatep. Lenir anati West Asia nung tensa atema tebilemtsü akaba lemsatepba den külemi security aser meimchirtem timtemba nokdangtsü atema longjemer inyaktsüla, ta

bangjem. Modi-i X ajanga, "Jordan Chuba, Abdullah II den jembuigo. West Asia region nung tang tensa atema jembuigo. Künati kiralongraba, raraba aser civilian aika taküm samaba atema tebilemtsü akaba lemsatep. Tekeratiba nung security agütsütsü aser meimchirtem kümzüksü atema longjemer inyaktsü nüngdak, ta bangjemogo," ta metetdaksü, Tang Israel aser Hamas na tsüingda raraba mapang nung Modi-i Jordan Chuba den jembu. October 7 nü Hamasa teloki

Israel amakdang nisung 1,400 dak tema tepsetba den külemi nisung 200 shi puer ao. Küm 75 tejaklen Israel linük tentetba sülen linük nung anogo ka nung nisung teimtiba asüba anogoji October 7 nü liasü. Iba sülen Israel-i rara sangdong aser tesüiba hopta ana tashi parnoki Gaza Strip amakdang Palestine nung 5,087 shi tepsetogo. Amongnü India-i IAF tayimtsü ka nung medical teyari touzük ton 6.5 aser tanga teyari oset balala ton 32 shi Palestine nung atema bener otsüogo.

Sorkari inyaktetba tulutibaji sensaker cr. 60 ajungkettsüba lir: Amit Shah

Ahmedabad, October 24 (Agencies): Linük nung sensaker crore 60 ajungkettsübaaji Modi sorkari inyaktetba mapatem rongnung tulutiba lir, ta Mongolbarnü Union Home Minister Amit Shah-i ashi.

Linük rongsenketzung tsütsü terenlok ajanga tajangzük tulutiba angurtemji yimtsüngtem nung alir sensakertem asütsüla, ta pai ashi.

Ahmedabad district kübok Sanand nung aliba industrial estate nung mini-industrial training institute (ITI) ka den hospital ka densema project balala tenzüksüba sentong nung jembidang Shah-i, Sanand GIDC nung ITI ajanga factory

balala nung inyaktettsüsa lisoporitem nem skills training agütsütsü aser industrial estate nung aliba units nunga mapa angutsü, ta ashi. "Linük aser state terenlok ajanga tajangzük tulutiba angurtemji yimtsüngtem nung alir sensakertem asütsüla. Iba atemaji ozü sorkari item ama facilities agütsür," ta pai ashi. Ato kilonser Narendra Modi lenisüba nung India ya alima nung rongsenketzung tulutiba linüktem rongnung jenjang 5buba kümogogo aser ita nung Chandrayaan anetetogogo, ta pai ashi. "Modi leniba nung India nung Parliament building tasenba yanglu, project balala tenzüksü aser mapatong tasen

aika benoka inyaker. Ajisüaka Modi leniba nung inyakba mapa tulutibaji linük nung sensaker crore 60 ajungkettsüba ya lir," ta paisa metetdaksü. Modi sorkari sensakertem nem sorochocka gas agütsür, electricity aser ki asütsür; sen lakh 5 health insurance agütsür aser sensaker crore 60 nem ita shia nisung shia nem jang seret pongungu (5) agütsür, ta pai metetdaksü. "COVID-19 wara mapang nung alimai India nung crore 130 atema tebilemtsü katsüogo, saka Modi-i scientist tem ajungmesoa aser nungita iba wara anema vaccines yanglu. Modi-i technology amshia COVID-19 nungi nüburtem kümzüc," ta paisa shisem.



October 24, 2023 nü Gujarat nung Banaskantha district kübok Palampur nung tang teyangyudak apu ka chireper aliba noksa nung angur. Iba lendong nung nisung ana asü.

Joko Asükwa Arurji
Mokozü madokba Mi
Mi awangtsü & Shi Akongtsü
Barbeque Yanglua Chiteptsüba Mapang

Tatsüktiba Mijang
(Hottest Bamboo Charcoal)

ITEM NUNG YA ANGUTSÜ

One Roof. Khermahal | Kitchen Queen, near City Clock Tower | Nagaland Decorative House, near Nagarjan Junction | Grab & Go, Supply - PWD- Duncan Junction | Kitchen Needs, DC Court Junction

Distributor | +91-9436001045
Distributor | +91-9612612302

+91-9436002285 | +91-8787584752
www.nagalandbambooindustry.com
nagalandbambooindustry@gmail.com

DIMAPUR
KOHIMA
MOKOKCHUNG



October 24, 2023 nü Chennai kübok Avadi anasa Electric Multiple Unit (EMU) ka tsükoker aliba noksa nung angur.

Karnataka nung Congress lenir ka tepsetba ken o nung nisung 6 puogo

Kolar, October 24 (Agencies): Karnataka kübok Kolar district nung Congress lenir, M Srinivas tepsetba ken o dak sendakba nung Mongolbarnü police-i nisung trok puogo.

Hombarnü Congress lenir tepsetba ken o nung Mongolbarnep Police-i Venugopal, Munendra, Santhosh, Nagendra, Harshit aser Arun Kumar nung apu. Police-i injang khaloktsüadang tongti aibelener ana- Venugopal aser Manindra na injang agi tetsüing yiru aser Santhosh-i yiru.

Police-i nisung kar puer aoba mapang nung nisung aseme police dak injang khaloktsüba sülen police-ia par asem dak injang khaloktsüadang parnok yiru.

Inspector Venkatesh den police ana- Manjunath aser Nagesh nungera yirua district hospital-i anir oa yaridar, ta police-i metetdaksü.

Kolar district nung nisung troki Congress lenir, M Srinivas tepsetba liasü. Srinivas ya taoba mapang assembly Speaker, Ramesh Kumar aser Home Minister G Parmeshwara na den kanga atongtepa inyaker ka liasü.

Srinivas-i ketdangtsüa pa indang restaurant ka tang teyangludak lir; pa iba nungjagi par farmhouse-i meyipa ao.

"Pai (M Srinivas) parnok meteta liasü aser parnok nem coffee agütsütsü atema security sepai tena ao. Pa meketa menden 3-4 shi liasü aser pa amaker kar idakji amen. Iba mapang nungji parnok rongnung kati pa tenük nung mozützü ka shiloktsü. Pa asatenba mapang nung kati kotari agi pa dak atsüing. Pa indang bodyguard-i ibaji angu saka tetsübu nung jenadok," ta police ketdangser kati metetdaksü.

Iba sülen Congress lenirji Jalappa Hospital-i anir aodang len tom nung asü. Osang angazükba agi, Venugopal aser M Srinivas na mapang talangka nungi kanga tsükchitepa liasü.

Osangbener den jembidang Kolar superintendent of police, M Narayan-i, "Parnoki anogo ananü tashi Srinivas itdangita aruba sülen tasemnübuba nung pa tepset," ta metetdakja liasü. State home minister Parameshwar aser toba mapang speaker Ramesh Kumar nati Srinivas'er kibong züngsemtem ajurua mangyim jashi lemsatepogo.



TIR YIMYIM YIMOBILEM (EDITORIAL)

DIMAPUR RASEMNÜ, MONGPUTENI (OCTOBER) 25, 2023

Lenmang tasen sapoktsüla

Alimabo tilaka dang, saka lenmang tasen sapoka nübortem anir aotsüba yabo alima tulu tila kecha mali mapa tasak, kasa lendong aser takoksa ajurutsüba mapa asünungji aikati nungnanger aser magizüketter, ajisüaka Naga lima nung nübortem nüchi kümdaktsüsü atemabo kecha matidaki len tasen sapoka aobaji Aotsür Aortem ya asütsü. Tanübo item lenmangtemji kanga sadema kümer jajar asünungji, len sapokertem dang nungibo tesülen anidakertemang tama aser tekaraba jajadagi. Ibaji lensapoker nükjidong atonger asütsü. Atangji, Naga lima nung Aotsür Aortemi Naga nunger inti atema nüchi küma jajatsü len tasen sapokbatemji Aotsür Aortembo tamasayongi nüchi kümer ajak meteta aliba agi masü saka tangar den kasasa nüchi mekümi aliba jenjang nung Tsüngremi aochia kümzüka aser nüchi kümtsüba ajanga lir. Iba Tsüngremer taochi aser temeim agi arong marem Aotsür Aortemi Naga lima nung Naga nunger songjen ajangzüksü atema len sapokba lenmangtemji Yisu temeim tamangba yimsü tajung, Khristan yimsü, agizükba liasü. Iba tashi nung Naga lima nung British nungertemi matongdak tesemtem tashi oa leptepsüngtep anendakja tsükchir agi tembar kümdaktsürtemji Aotsür Aortem lir. Iba jaji Naga lima nung yimjung aser tesünep putu tenzük. Ano, Aotsür Aortemi sapokba len tanabubaji kaketshisatsü angazükdaktsüba len liasü. Iba len sapokertem ya talangka azüngba tashitemetertem masü saka anarongdena Dr.Clark kinungsü Mary Mead-i tenzüka sayuba nungi tesem kar nung kar class 2 tashi aser kar 6 tashi zünger pei taküm samaa mapayui tangar dang zülutsü aser azüngtsü sayutsü atema temulungtetba tulu nung tetsüng agidang arem nema oa sayur samanirtem liasü. Item len sapokba nungi tenzüka ano Aortem kar government mapai aitsü tenzüka aser kar government contract mapa inyakbatemjia Naga nungertem asoshi len tasen sapokbatem liasü. Item lentemji mesapok tashibo Naga lima nung tesayur aser government mapa inyakertemji tzümartem dang liasü. Talisa, government office-tem nung tzümartem agi tasüng liasüba tanemi tanemi Aotsür Aortemi melena aruer, tanübo Nagaland government office-tem nung Union Public Service nungi arurtem kar dak alaka inyakertem ajak Naga nungertem dang lir. Atangji, tanü government mapa nung tangar Naga kintem dang nungibo Aotsür Aor teimba asütsü akok, aji Aotsür Aortemi tangar mezüngshiba agi masü saka len sapokertem asüba agi maongka tama anguba ajanga dang lir. Item len tasentem sapokba agi tangartem dang masü, ano, asenokang maongka aser temoatsü tuluba agia arudagi. Ajisüaka, item lenmangtem ajakji lenjen kümogo, anungji ano Naga nunger ajak asoshi len tasen sapoka aotsübaji tanü putu nunga Aotsür Aor khuret asütsüla. Joko, tesayuba wadang nunga asenok dang nungi tangartemi tajungba sayur, aji ajak asoshi tepelatsü aser anisüngzük ka asütsü. Ano, government mapa nunga, joko, Naga kin ajak nungi tazüng temeteter adoka rakteper, aji ajak asoshi takok ka asütsü. Itemji kodang jungjunga bilemdangdir, tang ya asenoki ajak atema len tasen mesapoktetra asenok ya asenoki anitetba purtem den mapa tilaka atema tamajung tentepa rakteptsüsa akümtsü, idangji asenokji tangar asoshi temoatsü aser teyarir masü temetsüdaktsüang ka kümadoktsü. Item tebilemstütemji paidoka asenoki len tasen ka sapoktetra, ano iba len tasenba jagiang ajak tasentepsü. Iba len tasenbaji tanü nübortem nungdakba oset mesüra chiyongsü yangluteta agütsütetba business aser 'Entrepreneurship' mapatem asütsüla. Idangjiang asenok kibur akümtsü aser talir masü tayoker akümtsü. Asenok government mapa nung anadaker iba lenmang nung talangka jajaa aruogo. Iba jaji asenok tasüa masü aser taküm-a maküm ta tai-ang jenti menaogo südi. Joko, iba lenji toktsür, ano nübortem chiremdaktsüsü atema len tasen tajungba ka sapoka aotsüba atema tangaria asenok atar amai angur.

OLEMSABANG

1986 LEMTET AGIZÜKA AYUBA INDANG

1986 ABAM Special Committee osang indang Yanglushidi Sensaksem Sabang nung adenertemi pei pei tebilemba lemsatepba nungi tenzük tang tashi iba lemtet indang osangsep nung züluba nungji tagitarutsüa aser tamagitsüa zülusemba ngua aruogo. Ano kari iba lemtet ya tanga lemtet kar agi melenadokogo ta jembiba angashir. Iba den joko tasür leper-a dena akaktsüsa iba keno yagi benjatepba ngua arudar. Anungji 1986 ABAM Central Council nung Special Committee Osang agütsüba sülen kechisa atalok item indang onok tenük kuli kar lemsateper.

Ibai shinga anema masü, saka tatalokbatem indangji dang lemsateper. 1981 - 1986 ABAM Special Committee nungji Aor laishir takutet par pezüi anir Ao Mungdang puti otsü meteter tebuteditem den pastortema densemer parnok nisung 15 Mungdangi shimtet. Iba Committee nung Convenorji: L.T. Maja ABAM Finance and Property Secretary liasü. Anungji Convenori Committee osang tatongi azüng, aser ABAM mendenbuba (asür) Pangersowa Akhoya, pai Special Committee osang nungji tangatetba jembitsü telok nem mapang agütsü. Telok nungi nisung asem pezü kati minute ishishi agia parnoki kechi angatet item indangji jembu.

Iba sülen Central Councili arurtem shinga menoktak nung ni (C. Walu Walling) Mungdang tezülur, mendenbuba dang mapang meshi. Mendenbubai kü nem mapang agütsüji pelaseta, kü mulung nung 1972 ABAMi Molungkimong arogo Centenary-i shinga maotsü lemtetbaji local arogo nung teka aiba agi timtemji adok ta bilema ni yamai ashi, "Mungdang nunger ABAMa Molungkimonga, Molungyimsena Centenaryji mongogo. Asenoki parnok Centenary mamonga ta meshitetsü. Local arogo Jubilee dak sendakba nung kechiba ABAM yamai nungsen agia rongsen lalutsü. Anungji Committee-i bener aruba ya agizüksü junger ta nibo shidangera, aser joko ABAMi iba keno nung kecha shilem (responsible) magitsü ta lemteta ayutsü junger" ta shir kü mendeni arua amen. Telokji second ishika nanüng adoka asatepba mapang Mendenbubai koda kechi bilemer ta telok dangji asüngdang nung, "tang ashibaji agidi" ta telok nungi nisung kati ashi. Idangji Mendenbubai koda kechi bilemer ta asüngdang nung telok ajaki tang ashibaji agidi ta sür teka mekanga agizüka ayu.


1986 küm ABAM Ketdangpurji: Mendenbuba: Pangersowa Akhoya, Teyariba Rev. T. Luen A/Pastor Mokochung Town Baptist Arogo, aser tezülur ana: C. Walu Walling, aser Miss Awala Longkümer ta liasü. Onok rongnung tsürabur Pangersowa alima nungi pilaogo, saka onok asembo taküm ali nung ozü aseme 1986 Lemtetji tang tashi taküm lir ta bilemer ta tezüluba nung onok nungzülu agütsüba teküboklen agütsür.


Ao Naga tenemi Yisu yimsü aruba ken-o dak sentakba nung 1986 ABAM Central Council nung 1981-1986 Special Committee ajanga bener aruba Central Councili agizübaji tanü tashi akanga lir ta onoki kuli agütsür.

1986 Special Committee osang agizüka ayuba ajanga 125 (SQC) nungbo Molungkimong aser Molungyimsen arogo anaprongla nung ABAM Executive Secretary-i ABAM tenüng nung shilem agiogo. Anungji 1981-1986 Special Committee dang ABAMi pelatsüla.

1986 ABAM nung mendenpurtem rongnung Mendenbuba alima nungi pilaogo, saka Mendenbuba yariba aser Tezülur ana onok asem tang tashi taküm ali nung 1986 Special Committee osang Mungdangi agizüka ayubaji tang tashi taküm lir ta onokibo kuli agütsür.


Rev. T. Luen Menden yariba


Rev. C. Walu Walling Mungdang Tezülur


Rev. Awala Longkümer Mungdang Tezülur

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kohima Diocese-i küm 50 ajungba Jubilee amongtsü renemer

Kohima, October 24 (TYO): Kohima Diocese-i küm 50 ajungba Golden Jubilee amongtsü atema renemdar; 'Khrista aser Pa Arogo atema' omen nung ajemdaker iba Jubilee amongtsü, ta Jubilee Committee-i sangdong ka ajanga metetdaksü.

Küm piyong Jubilee dak sendakba sentong balala agia aruba sülen tatemsa October 28-29 anogotem nung Jubilee sentong tembangtsü.

North East nung diocese 15 nungi tongti putirtem aser northeast region den linük tesem balala nung tejaokertem aser state tesem balala nungi Arogo lenirtem iba Jubilee nung adentsü.

Cultural sentong den tetushi agütsüba sentong nung alakteta jaokerji Nagaland state Angh, La Genesan asütsü aser tetushi tejaokerji Chief Minister, Neiphiu Rio asütsü. Iba dak alia Cabinet züngsemtem, MLA tem, sorkar ketdangsertem, police aser defense forces nungi ketdangsertem aser denomination balala nungi Arogo lenirtem adentsü.

"Jubilee amongba ya Laishiba nunga shia lir. Levi tapu 25 nung Israel nungertemi Jubilee mapang meyipa reprangshiba, asüngsashiba aser tanaben bendanga agütsüshiba mapang ka südaksüba indang shia lir. Kohima diocese nung jubilee amongba ajanga Arogo

mission asüngsashitsü imlar," ta kasa sangdong nung shia lir.

Nagaland nung mezüing Catholic missionary tem rongnung Msgr. Emmanuel Bars, SDB & Srs.Pilar Gonsalves aser Guadalupe nung liasü aser parnok ya Missionaries of Christ Jesus nungi liasü. 1948 küm December ita nung parnok Kohima tonga aruba sülen parnoki Naga Hospital, Kohima nung mezüing tenzuka liasü.

1954 nungi Sister temi iba hospital toktsü, kechiyong sorkar aser hospital nung inyaker Spanish sister tem tsüingda contract temadok. Iba mapang tashi nungjibo parnoki Catholic tamanger kar baptitsür liasü. Fr. Marrocchino SDB-i Msgr. Bars melenzük aser maneni santem repranga ali.

Fr. Marrocchino-i mezüing Kohima village nung Khristmas petinu yanglua telung nung kerosene milen ka inoker tsüklok; ibaji ngua nisung aika kanga süngmangtepa liasü. Tanemtanemi yimtsüing aika nung catholic tamangertem aika aküm.

Tamangertem renlokba ajanga Pastoral aser Arogo mission nung rangloksüsa aküm. Anungji Kohima Diocese - Imphal 1973 küm tenzük aser state ana- Nagaland aser Manipur nung tamangertem anepalutsü atema mapa nungloksü. Asür, Bishop

Abraham Alangimattahil SDB mezüingbuba bishop liasü. 1980 küm Nagaland aser Manipur na atema diocese temeja tentet.

Diocese tasen tentetba ajanga state tesem ajaklen osangtajung proksü atema Catholic missionary tem asoshi lenmang lapokja Tsüingrem temeim lemsatepba den külemi shisaliok, medical aser loktiliba tenzükba tsütsü ayimjema liasü. Iba mapang nungjagi Nagaland nung Catholic Arogo züngsemtem, rejutem aser kiojen renlok.

Tanübo parishes/centres 57 kübok züngsem 63,000 dak tema lir. State nung diocese indang university ka, college pongu, Higher Secondary School 29, High School 32, elementary aser primary school 45 lir.

Diocese-isa health centers, dispensaries, palliative care center, vocational training centers, pastoral training Centre aser social welfare mapa balala ajanga state nung nüburtem tenzük. Nagaland nung aliba kin ajak atema Arogo lir, putir 76 aser sisters 226 lir.

Golden Jubilee mong ya temaitsü tulu aketba benjungmong lir, kechiyong Nagaland nung Catholic Arogo menor tenzükuyonga tanübo state nung nübur meyirjang aika taküm nung kongshiba Arogo ka kümogo, ta sangdong nung shia lir.

India nung Khristantem anema inyakba kanga bulua kümogo: RI

October 24, 2023: Khristan melungtet telok- Release International (RI)-i, India nung Khristantem anema inyakba kanga bulua akümba ya taoksatsüka lir, ta metetdaksü.

Right-wing teloki ajungmesoa Khristantem anema inyaker aser anti-conversion ozüingtem nung ajemdaker Khristantem apur, ta RI-i metetdaksü.

United Christian Forum (UCF)-i ashiba agi, taküm küm tenzük August ita tashi nung India nung Khristantem anema inyakba tatalokba 525 lir.


UCF-i, India nung state 28 nungi shilem 40 nungbo anti-conversion ozüingtem benoka lir aser item state teimbaka nung BJP sorkar lir, ta metetdaksü.

United Christian Forum-i, Khristantemi kangshia tamangba yimsü meyipdaksür, ta tai tonglokja Khristan 520 puogo, ta metetdaksü.

International Christian Concern (ICC)-i, 2020 küm nungi tenzuka tang tashi nung Uttar Pradesh state kija nunga Khristan 400 jungnüa puogo aser taoba ita- September kija nunga Uttar Pradesh nung

Khristan 50 puogo, ta metetdaksü.

Release International CEO, Paul Robinson-i, "India nung Khristantem anema inyakba kanga bulua akümba ya taoksatsüka lir. Ano shisabulutsüsa kaji- India nung Khristantem anema inyakyonga ibaji hau ta m a g i z ü k t e t e r . Bushisüingdangba osang aser item reports ya tejangja ta agizükteta Khristantem anema inyakba ya India aser alima linüktemi nokdangtsüla," ta metetdaksü.



Amongnü (October 22, 2023) Yirusalem yimti tejenba nung aliba Holy Sepulchre Tenla kidang Gaza nung Tenla ki ka poksaba lendong nung asür Khristantem bilemteta sarasademba sentong nung adenertem kar noksa nung angur.

ANO GO ABEN TSÜNGREM DEN

Inyakyim mesüra nisung

"Aji asünung bendangertemi pei temulung uluba nung jajaba ama nenoki ano mejajatsüla" (Ef. 4: 17).

E.M. Bounds-i sarasadem indang züluba nung yamai zülusem: "Arogoi tajungba inyakyim bushir; Tsüngremi nisung tajungba bushir." Tenzükba mapa nung asen sobaliba den apet melenshia inyakbaji junger. Saka ibaji asenoki Lai tesayuba kübok inyaktsüla. John Blanchardi tekümdangtsü o ka yamai agütsür - "Inyakyim bendenloktsü asoshi osangji agienadoktsüba jenjang nung na kodanga teli".

Tasaji Tanela Temeshi ajanga meshitetsü akok - Anitet (31:1-5). Zerubbabel-ji tasa tajung asateta inyaker tajung ka liasü. Aji saka, pa dangi Kibuba oji "Tashi agi masü, mesüra ain agi masü, saka kü Tanela ajanga aru." (Zak. 4:6). Tangar dang nungi tajungba sayutsüngiteter tali tekümdangtsü mesüra Tsüngremi amshiba nisung masü saka o jembir tulur / nisung ka dang akümtsü. Leonard Ravenhill-i pa kaket nung yamai zülü: "Ne sempet (Talent) sayutsü asoshi sayutsüngidak sabangji dokan kichiba asütsü akok".

Yimjak nung ken ateneri teka anapronglai microphones nung amer microphones anasa tebang yur ken atener. Saka sayutsüngir teka külen sadoka melira Laishiba koda lapoka sayutsüngitsü? Tangar mulung nung mesotstsü atema sayutsüngi masür saka angatetdaksütsü asoshi sayutsüngir. Yisui telok dang asüngdang - "Saka nenoki kechi ajitsü ao? Süoshi tanük sobuba nisung ka ajitsüba asü? ainkar ka ajitsü asü? Au, ni nenok dang ashir, "Ainkar danga kanga taoba" (Mt. 11 :8,9).

Meghalaya nung Arogoi Amongnü Cherry festival memongdaksüner

October 24, 2023: Khristan Paisa, Khristantemia tanga nütsüing teimba aliba yimsü amangertem den külemi Meghalaya state nung Arogoi state sorkari ayongzükba state sorkar dang Amongnü benjung nung ya shilem agia Cherry blossom festival arudar, kechiyong iba sentong mamongtsü mepishiogo. ya pei sobaliba sayatsü atema

Meghalaya nung Shillong maongka agütsüba sabang lir, Cherry Blossom Festival ya ta ashi.

benjung tulu rongnung ka lir; "Onoki nüburtem taginübaji iba benjung nung kentenmenü, akhümtsübur, saka state nung fashion, literature aser Khristantemi Amongnü anogo sobaliba sayar. Iba benjung nungbo tekülem sentong agia nung adentsü atema alime anisüingzuka amonger. Iba tesem balala nungi anogo nungbo official sentongtem magir mesüra ralarwalirtem aika arur. shishilemba masür," ta

Iba festival ya taküm November 17 nungi 19 tashi Lyngdoh-i metetdaksü.

Amongtsü saka November 19 yabo Amongnü anogo lir.

October 24 nü osangbener sangdong ka ajanga, "Onoki den jembidang Shillong nung iba sentong anema Archbishop, Victor Lyngdoh-i, "Onoki iba benjung manemer menokdaker saka Amongnü ya Khristantem aser saka sorkar dang iba benjung Arogotem atema temeshi ya Amongnü masü saka anogo lir," ta metetdaksü.

Honibarnü tembangtsü Meghalaya nung nütsüing mepishir, kechiyong Amongnü million 3.2 lir aser iba nungjagi yabo Khristantem atema nütsüing shilem 75 bo temeshi anogo lir," ta ashi. Khristantem lir.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Saru

(v) ajak dang nungi bendenba (collection of tax or offerings)
* Tanü lokti nung asenokbo saru aika lir.

Sarusaji

(v) nungdak balala atema ajak dang meshiba (act of collections)
* Timtemaka lokti, arogo aser yimten sarusaji ajak agütsütsüla.

OLONG PAITEP # 6675

15x15 crossword grid with numbers 1-19 indicating starting positions.

TIPIEN

- 2. Teburtemi tejak nung awaba - (8)
6. T ___ em - (3)
8. Tzük ayudak - (3)
9. Nungdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6674 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti,
12. Süir, 13. Jen, 14. Ola,
16. Talak, 17. Mazük.

LANGTSÜNGLEN :

- 1. Tenükjang, 2. Luden,
3. Kiochtsü, 5. Lenti,
7. Tajangzük, 11. Teronem,
12. Sempa, 13. Jahaz.

NAI-A YA METETTER MA



India nung mezüngbuba aser talangtiba Prime Minister inyaksangji Jawaharlal Nehru lir. Pai küm 16 ser anogo 286 (15 August 1947 - 27 May 1964) tashi Prime Minister inyaka liasü.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

India aser Malaysia Army tem Meghalaya nung training agir



Guwahati, October 24, 2023

(Agencies): India aser Malaysia Army tem bilateral training exercise ka Meghalaya kübok Umroi Cantonment nung tenzükogo.

Iba dang "Exercise Harimau Shakti 2023" ta ajar aser tesüsaba sentongji November 2022 nung Malaysia kübok Pulai, Kluang nung agia liasü.

Taküm Harimau Shakti sentong ya November 5, 2023

tashi agitsü aser linük anaprong nungi sepai 120 shi adener. Iba ya Multi Domain Operations alizüing yur agir.

Iba training nung linük anaprong nungi army temi Joint Command Post amenoktsü aser Joint Surveillance Centre ka ajanga integrated surveillance grid tenzüktsü.

India aser Malaysia Army temisa jungle/semi-urban/urban environments atema joint forces

training agitsü.

Iba training nungsa Drones/UAVs aser Helicopters amshitsü aser casualty management o evacuation drills agitsü.

"Exercise Harimau Shakti" ya Indian Army aser Malaysian Army tsüngda defence cooperation jenjang ajungketsü aser linük ana tsüngda tesentaktep akangshitsü, ta defence sangdong ka nung metetdaksü.

Mizoram election nung Congress-i aika nangzük

Aizawl, October 24, 2023

(Agencies): Congress party-i Mizoram atema election manifesto sayaogo aser nübortem dang tenangzükba aika agiogo.

Congress-i Mizoram nung sorkar akümstsüsa takok ngura Rs 750 agi LPG cylinders ayoktsü, ita sha Rs 2,000 agüja old pension scheme tenzükshitsü, Rs 15 lakh tashi health insurance coverage aser tanga welfare schemes aika tenzüktsü ta nangzükogo.

"Onoki tashitsütsü maliba aser ochishia inyakba sorkar tajung ka akümstsü nükjidong

lir. Onoki village councils aser local bodies nem tashi, mapa aser senotsü talila agüja local governance tashi itdaksünür" ta Mizoram Pradesh Congress Committee (MPCC) Spokesperson Ronald Sapa Tlai-i ashi.

Congress party-isa connectivity, airports aser electricity supply dena infrastructure renloknür.

Young Mizo Entrepreneurs Program (YmElevate) ajanga aluiyimertem aser entrepreneurs yaritsü, Mizo lanurtem nem startup funding agütsüsü aser mapa 100,000 adoktsü ta Congress

manifesto nung nangzükba lir.

Parnokisa sorkar mapa inyaker kkibong shia nem Rs 15 lakhs tashi health insurance coverage agütsütsü nangzükogo.

Congress-isa terminally ill patients atema Rs 5 crores lezmüktsütsü aser Old Age Pension Rs 2,000 agütsütsü.

AAY aser PHH cards aliba kibongtem den kinungba maliba kibongtem nem LPG cylinder Rs 750 agi agütsütsü. Congress party-isa National Social Assistance Program kübok amitsür aser matamabensar nem ita shia Rs 2,000 agütsütsü nangzükogo.

Manipur nung CKLA telungpur 2 den prangpong-injang aika angu



Imphal, October 24, 2023

(Agencies): Manipur Police-i central armed forces den külemi mita aodang Myanmar nung amenoka aliba telungpur telok CKLA (Chin Kuki Liberation Army) indang prangpong-injang, drugs aser sen aika ngutetogo.

Manipur police aser 36 Assam Rifles külem telok kati Indo-Myanmar arrtsü anasa Cheljang nung mita aodang CKLA telungpur ana den prangpong-injangtem apu.

Tena ya Ngamkhosei Baite (32) aser Lunminthag Haokip (25) na ta jangjaogo aser tenaprong Churachandpur district nungi lir. Tenati 2020 küm CKLA nung aden.

"CKLA ket nungi AK47, Insas, Sniper aser M16 rifles den opium seret 2.5. Rs 4,86,500 aser tanga osettem puogo" ta Manipur Chief Minister N Biren Singh-i metetdaksü.

Taoba mapang National Investigation Agency (NIA)-i

Myanmar aser Bangladesh nung amenoka aliba telungpur teloktem dena 'transnational conspiracy' lir ta ken o benoka lir ta CM Biren-isa ashi.

Parnoki Manipur nung mepetmesü adokdakja India sorkar anema rara menatsü tasa atong ta paisa shisem.

CKLA züngsemtem apuba aser prangpong-injangtem ngutetba ajanga iba tasa indang kuli agütsür, ta Manipur CM-isa ashi.

Gaza nung nisung tepsettsü Israel nem licence magütsütsüla: Qatari emir

Doha, Mongputeni/Oct. 24 (Agencies): Qatar yimsüsüri alima dang Israel-i Hamas anema raraba azüoktsü ayongzüksü ashi aser Gaza Strip nung tapi agi nisung tepsettsü asoshi Israel sepai nem temelaba magütsütsüla ta shia liasü.

Küm shia amenba Shura council senden Mongulbarnü tenzüka jembidang, tanen makai raraba nungya lendong lir aser region amokmerener, ta Sheikh Tamim bin Hamad Al Thani-i ashi.

"Ojang süang ta onoki ashir. Nisung tepsettsü asoshi Israel nem talenba makai 'green light' aser 'free licence to kill' agütsütsü kanga tim masü aser tanen makai 'occupation, siege aser settlement' asangsang tia senzüka meyütsütsüla," ta pai ashi.

Anatsülen tai maket civilian tem anema azüdokshiba pai aitsü saka alimai anatsü nok ama aliba aser Palestine

tanurtembo tenünga mali aser parnok takumbo malang ama inyakba aija liasü.

October 7 nü Hamas teloki ajungbena southern Israel amakba sülen Israel-i tayimtsü amshia Gaza amak tenzüker hopta ana dak tali lir Sheikh Tamim-i iba ola ya adoker alitsü.

Hamas-i amakba nung civilian timba sür nisung 1,400 dak tema tepset ta Israel ketdangsur temi ashir. Iba sülen Israel-i Gaza nung tanen makai maka arudang nisung 5,000 dak tema tepsetogo aser item rongnung shilem 40 tila-tanurtem lir, ta Palestine ketdangsur temi ashir. Parnoki iba tesem ajunga sapanger chiyongtsü, tzu aser totzü ajunga nokdanga lir.

"Nütsüng ajunga anema hadir ama tzu, mozü aser chiyongtsü nokdangba asen mapangbo memelatsüla," ta Qatari emir-i ashi.

Gaza indang health facilities

shilem asem nungi anabo mapa meinyaki lir, ta World Health Organization ajanga ashir.

Gaza nung mozüki 35 nungi 12 densema healthcare facilities 72 nungi 46 shibangogo, ta ashir.

Israel-i mokdangba ajanga electricity maliba aser generator atema totzü maliba aser tayimtsü amshia amakba ajanga raksatsüba mechi nisung tali anepalua aliba mozüki tem shibangtsüsa akumer ta Palestinian health officials ajanga ashi.

Tesüiba ghonda 24 tsungta Israel-i tayimtsü amshia amakdang Gaza nung Palestine nung 704 tepsetogo, ta health ministry ajanga ashir.

Iba rara tenzüker Gaza nung nisung 5,791 tepsetogo aser nisung 16,297 yirua lir. Occupied West Bank nung nisung 96 tepsetogo aser nisung 1,828 yirua lir. Maneni Israel nung nisung 1,405 takum samaogo aser nisung 5,431 yirua lir.

Mexico nung police 12 densema nisung 22 tepset

Mexico City, Mongputeni/Oct. 24 (Agencies): Mexico central ase southwest tsütsü anogo ka nung azüdokshi lendong balala ataloka police 12 densema nisung 22 süogo, ta ketdangsur temi ashir.

Hombarnü mejangjaba nisung temi Guerrero state kübok Coyuca de Benitez nung security patrol ka amakdang municipal police officer 11 khaseta liasü. Iba yagi taküm linük nung police tepsetba 340 dak tema akumer, ta non-profit group Causa en Comun-i ashi.

Mexico nung tesensaktiba aser temesepba mozü shibelener aser police tsungta kanga sashia raraba Guerrero nung amakba indang ketdangsur temi buhisüngdang südagi, ta prosecutor Alejandro Hernandez-i ashi.

Guerrero north tsütsü Michoacan state nunga mayor ka adianu ka tepsettsü merandang nisung pongu khaset, ta state prosecutor kati ashi. Police ka densema nisung pongu tasümgang ya Tacambaro jila indang highway nung ngutet.

Tasembuba lendong ya Puebla nung temesepba mozü shibelener tem tsungta khatepba mapang nisung trok asü aser ana yiru, ta regional sorkari ashi. Iba lendong ya linük yimtiba Mexico City nungi mile 75 shi pilar San Miguel Canoa nung atalok.

Mexico nungya temesepba mozü shibelener aser mapa tamajung inyaker temi lendong timtem balala agütsür aser 2006 küm nungi temesepba mozü anema sorkari anir rara arudang nisung 420,000 dak tema tepsetogo.

(Maneni tapak 8 nung...)

SANGDONGER

Chuchuyimpang Mongoya Prayer Garden nung 27th to 29th October, 2023, anogo asem Healing Crusade sentong agitsü renema lir. Anungji nübur shirnok shi aser Tanela nung taneptsü aginüa ali, temulunger ajak arua Tsüngremer temoatsü agitsü pelashishia jaoker.

Tongtepratepdak - 9856486841 / 8258802047

Mapang - Aonung : 5:00PM
Anepdang : 9:00 AM
Anüngdang : 12:00 Noon
Sunday Devotional : 10:00 AM

AO RIJU SANGDONG

Mongputeni 14, 2023 Anogo Dissertation Viva Voce Agia Tembangertem takoker osang:

Reg.No	Division	Reg.No	Division
PGDT/226/20	1st	PGDT/205/19	1st
PGDT/154/18	2nd	PGDT/191/19	1st
PGDT/249/21	1st	PGDT/251/21	1st
PGDT/250/21	1st	PGDT/254/21	1st

Sd/- (Prof. Rongsen Longkumer) Chairman, Ao Riju
Sd/- (I. Temjen Tzüdir) Office Coordinator, Ao Riju

* Mongputeni 25, 2023 anogo nungi Marksheet office nung angutsü. Marksheet agizüki arudang Admit card Photostat copy ka bener arutsü metetdaksür.

Pakistan indang taoba PM Imran Khan anema ken o tasen benok

Islamabad, Mongputeni/Oct. 24 (Agencies): Linük indang miim inyakyim (state secrets) temai adoktsüba atema Pakistan nung court kati Imran Khan anema ken o benok ta osangtem ajanga ashir. 2022 küm April ita ato kilonser menden nungi atsüngdoker alisang anema ken o jenti benoker alidang iba osang ya angazüker.

"Pa anema ken o tanü benok aser tai tongloktsübatem yimjak nung azüng," ta Islamabad nung Khan puoka aliba Adiala Jail kima Federal Investigation Agency nungi Shah Khawar-i Hombarnü ashi.

Kasa ken o nung Khan indang taoba deputy, Shah Mahmood Qureshi daka tai tonglokja lir.

Khan'er Pakistan Tehreek-e Insaf (PTI) party odongtar kati ashiba agi, colonial-era Official Secrets Act kübok kishi shibanger ken o jembia tai tongloktsü aser iba ken o ya jembishitsü.

2018 küm August ita nungi

2022 küm April ita tashi Pakistan indang ato kilonser inyaksang Khan-i Washington aser Islamabad tsungta zülutepba shiti ka temai adok aser iba yongji pa menden nungi atsüngdokba nung United States shilem lir ta pai ashir. Ajisüaaka pai aitsüba ya US aser Pakistan-i magizüker.

Senotsü junga ketdang masüba tai tonglokja Khan ya 2022 küm April ita parliament nung no-confidence vote ka ajanga anenja liasü.

Linük nung tashi tait mitkar den mangatetep adokba aser parliament anentsü merangba sülen pa yimli laotsüsa akum. Pai parliament anentsütsü merangba ya constitution agi memelaba mapa lir ta linük indang Supreme Court ajanga ashir. Iba sülen pa anema ken o aika benoka lir aser item rongnung kiralongraba, court mezüngmeshiba aser tamangba yimsü mezüngmeshiba densema lir.

Pa ato kilonser menten nungi atsüngdoka aser mapa tamajung

Mulungnen O



Onoki kodanga amatsü makokba ozü temeim asür Miss Limasangla Longchar (Chuchuyimlang) sür küm ka renteta arudang pongmang amai, oda kidangi shilangtsü yongyaseta liasü, saka tanü asangsang nung majurutep küm ka ajungdang kangasa menungrar. Anogo ka danga na memenungrai süidaksüba mali tanü tashi aruogo. Na akümüli nung alidang ajak dang tejungnü, tagütsünü aser temeim shisatsü agi ajak yariteptetba len sayur tajung ka liasü. Na nungi onok aika angazükogo, itemji onok asoshi taküm nung leniba südaksüdi. Tajung Tsüngremi nü nula tesünep aser anisüngzük nung tokjangma ta tanü onok ajaki sarasademja amonger.

- Temeim Obala aser Kinungertem.

Office of the Tuli College Tuli, Nagaland

Tuli College Founding Member General Meeting Ayongzüker 28 Oct. 2023 (Saturday) anogo nung Tuli College Founding Members general meeting ka Tuli College Auditorium nung alitsü ayongzüker.

Asenok Founding Membertem nungita bena aliba Tuli College ya tashi taitba nung bener otettsü atema kija mesüra lokti tentet ka nem nungloka bener odaktsütsü atema shisa tokdena jembiteptsü, aser iba general meeting nung kechi lemtetdir ibaji mapa küma inyaka aotsü asünung, founding members bendangli balala nung alir aser Tuli area nung alirtem ajak absent mesüi atentsü mepishia metetdaksür.

Sd/-
J. Yanger Imsong
Secretary,
B.O.G. Tuli College

SANGDONGER

13th Marsosang Football Trophy,
Chuchuyimlang nung December 2nd week
2023 nungi asaya tenzüksü. Anungji,
tejangratemi agüja aliba number nung
tongteprateptsü sangdonger.

9612454540 / 7085251794

inyakba tai tonglokja liaka Khan bhukumer jenti lir. 2023 küm May ita pa mapang tatsüka tepuokdak ayuba sülen pa bhukumer temi linük tesem ajungalen longkak aita mapang ka-kabo azüdokshia liasü.

Pakistan mitkar temi telangzüba tesashi agüja Khan bhukumer meyerijang aika apu aser PTI lenir ajunga amai jena ao. Iba sülen aika PTI party toktsüogo.

August ita Khan ya ochimashi ken o nung aija küm asem tepuokdak ayutsü obendang agütsü. Iba taittsüba ya mapang tatsüka lir thinentü, saka linük miim inyakyim temai adoktsüba ken o nung court-i obendang magütsü liaka tepuokdak nungi manizüki lir. Pa ya ano January 2024 elections nunga shilem magitsü tenokdangba agüja lir.

Tang tesüsa Khan-i miim osangtsüsang temai adoktsüba ken o nungya küm 14 tashi tepuokdak ayutsü akok aser ken o kar nungbo tasüba temerenshi

agütsür ta pa indang okatsür temi ashir.

Tepuokdak nungi Khan-i pa tangsa tashi taitba lir ta ashi aser mapa tajung inyakba mechi pa atsüngdoktsü meranger ta pa anemertem aija liasü.

"Teimla samaa lula teli. Election ajanga masü shima aliba telok aser parnok den yariteper anema maneni ola adokang aser linük nung election shidak inyaktsü takhangba agüjang," ta pai ashi.

Yimtenen tsütsü Khan asoshi arür aser asemben ato kilonser inyaka alisang Nawaz Sharif Deobarnü Pakistan-i meyipa shilanga liasü. Pa küm pezü bendang lima nung jenoka lir January 2024 election nung tokteptsü nükjidong nung meyipa shilang. Sharif ya election nung shilem magitsü tenokdangba agüja lir, saka par party aser army tsungta telung nung tezüngzüktep agiba nung shilem ka ama item tenokdangba ya agentsü akok ta aikati ashir.

Mokokchung nung Boxing coaching camp tembangogo



Mokokchung Town kübok Imkongmeren Sports Complex nung aliba P. Shilu Ao Park nung 2nd Intensive Free Boxing Coaching camp tembanga October 24, 2023 nü sentong ka agidang tangokba noksa nung coaches, Boxing Association Mokokchung ketdangsürtem aser training agirtem angur.

Dimapur, Mongputeni/Oct. 24 (TYO): Anogo 14 tashi training tesashi agiba sülen Boxing Association Mokokchung (BAM) ajanga Department of Youth Resources & Sport aser Nagaland Amateur Boxing Association den lungjemer ayongzükba 2nd Intensive Free Boxing Coaching camp October 24, 2023 nü tembangogo.

Iba camp tembangba sentong ya P. Shilu Ao Park, Imkongmeren Sports Complex, Mokokchung nung agia shilem agirtem aser coaches tem nem kulizüing kaket agüja liasü.

Iba camp atema arishi küm telemsa balala nung tetsür aser tebur nisung 31 tenüing zülüoka

liasü, kong Department of Youth Resources & Sports nungi L. Choppy ya coach liasü aser teyarir Khelo Indian Sports Centre for Excellence (Boxing) nungi state boxer Uzhozu aser Manchen liasü.

Iba camp tembangba sentong nung jembidang, camp nung adentsü tejangraba nung nisung aika aruba atema coach L. Choppy-i temolung asüba lemsatep aser shilem agirtemi boxing indang yimya balala kanga kera angazükba atema tenüingsang agüja liasü.

Iba camp nung shilem agiba lanurtemi azümesena melie jeretpereta training agira küm pongu tsüingta state aser northeast nung dang masü saka national aser international

jenjang nung takok angutsü ta pai ashi.

BAM Executive member, Aleyanger Jamir-i tajungshi o jembidang yimya tajung amshitsü aser indang-indanga rangloker saisapong nung dang masü saka pei takum nunga dangar dang tajungba akumtsü ayongzükba liasü.

Paisa Nagaland Amateur Boxing Association (NABA) tir Meren Paul-i züluba shiti ka züing liasü.

Iba sentong nung menden ya Tajungla Longkumer, BAM Executive member liasü aser Tsüingrem temoatsü jazüka Associate Pastor (Youth Ministry), Yimyu Baptist Church, Moa Jamir-i sarasadema liasü.

MDFA Trophy 2023 tenetnü buba asaya osang



MDFA Trophy 2023 tenzüker October 24, 2023 tanabuba asaya NU Lumami aser ARKA United tsüingda asayaba mapang tangokba noksa angur.

Mokokchung, Mongputeni/October 24 (TYO): Mokokchung District Football Association ayongzükba akaba MDFA Trophy 2023 tanü October 24 anogo tenetnü buba mezüingbuba asaya Moanungsang aser Brotherhood asaya aser tanabuba nung ARKA united aser NU Lumami tsüingda asaya liasü.

Tanu mezüingbuba asaya Moanungsang aser

Brotherhood tsüingda asayaba nung Brotherhood telok nungi minute 32 buba nung jersey no 7 Tarepnungsang-i goal 1 yok saka Moanungsang telok nungi jersey no 19 Rongsenchiba-i minute 9 aser minute 14 nung goal 2 yok aser jersey no 11 Jungshiwati aser jersey no 6 Molutsüpong-i minute 79 aser 89 buba nung goal kaka metsüokja Moanungsang teloki goal 4-1 agi Brotherhood ayong ayonga dang akok.

Tanabuba asaya NU Lumami aser ARKA United tsüingda asayaba nung asaya tenzükli minute 3 buba nung ARKA United nungi jersey no 7 Putimeren-i goal 1 yok aser iba sülenbo anisüingzük mapang mapang amatong tashibo par telok akoktsü ama asaya liasü. Saka anisüingzük mapa agir asaya tenzüker kelenbo minute 49 buba nung NU Lumami telok nungi jersey no 7 M.Phaowang-i goal 1 yokteta telok ana kasasa akum. Iba sülenjibo telok ana kanga dang nungtepa asaya meso aser iba mapang nung minute 57 buba nung ARKA United telok nungi jersey no 4 Chubawati-i goal 1 yoka par telok tanaben takoklen asü, saka NU Lumami telok nungi minute 77 aser minute 86 buba nung jersey no 4 Wangtin aser jersey no 7 M.Phaowang tenati goal kaka yoka NU Lumami teloki goal 3-2 agi ARKA United koka liasü.

October 25, 2023 MDFA

Fixture

12:00PM Legendary Vs SSS
2:00PM Super Seniors Vs Lomuden FC

Mkg. nung 26th Inter District & State Table Tennis Championship 2023 asayadagi

Mokokchung, Mongputeni/October 24 (TYO): Nagaland Table Tennis Association (NTTA) akhum kübok Mokokchung District Table Tennis Association-i ayongzükba Multi-Purpose Sports Complex Mokokchung nung 26th Inter District & State Table Tennis Championship 2023, October 23 nungi ayongzükba kadagi aser October 26 nü tembangtsü. October 23 nü iba sentong

Information & Public Relation, Soil & Water Conversation, Advisor, Imkong L.Imchen-i meraket keta tenzüktüsügo.

Iba sentong nungsa NTTA tir Vitho Neikha-i Coffee Table Book sayatsü.

Iba asayamung tetoktepba nung Chumoukedima, Phek, Wokha, Mokokchung, Nuiland, Tseminyu, Shamator, Kohima, Tuensang, Dimapur, Zünheboto, Kiphire, Longleng aser Mon ta nungi asayar 118-i shilem agidagi.

Syed Mushtaq Ali Trophy 2023: Karnataka-i wkts 9 agi Nagaland akok

Dimapur, Mongputeni/Oct. 24 (TYO): Maharana Pratap College Ground, Dehradun nung October 23, 2023 nü Syed Mushtaq Ali Trophy 2023 asayadang Nagaland ya Karnataka-i wickets toku agi koka liasü.

Toss nung tamakok anguba sülen Nagaland ya mezüing batting mendaktsü aser Karnataka nungi bowler temi kanga junga onteta Nagaland-i runs 68 dang yangluteta liasü.

Iba asaya nung Hokaito Zhimomi (17 runs) aser Jaganath Sinivas (11 runs) nati dang 'double figures' yanglutet aser tanüingba asayartemi runs

ter tekübok dang yangluteta liasü.

Takok angutsü asoshi runs 69 nüngdaka asayaba mapang Karnataka-i iba runs ya overs 7.5 nung yangluteta liasü. Karnataka nungi Devdutt Padikkal-i runs 31, Mayank Agarwal-i runs 19 aser KL Shrijith-i runs ti yanglua takok angu.

Nagaland ya Tamil Nadu den October 27, 2023 anepdang 11:00 ako nungi tenzüka Abhimanyu Cricket Academy, Dehradun nung asayatsü aser iba asaya ya Jio Applications aser Sports 18 channel nung live sayutsü.

Mexico nung police 12... (Tapak 7 nungi...)

Iba sülen Mexico nung nisung tepsetba ya asemsü agi timba küma nisung 100,000 nungi 25 tepseter ama kumogo.

1962 nungi Mexico nung nisung 110,000 dak tema samaba osang lir aser item ya timba mapa tamajung inyakba telok dak tai tongloksür.

Temesepba mozü shibelener aser security forces tsüingta mapang shia raraba agi kongshiba region tem rongnung Guerrero aser

Michoacan ya tamajungba lir. Elections agitsü mapang tsüinglanglen aliba ketdangsür dak azüdokshiba tali ataloker. Mexico nung tir elections ya June 2024 nung agitsü lir, kong taoba Mexico City Mayor Claudia Sheinbaum aser opposition lenir Xochitl Galvez tsüingta tokteptsü.

Ajisüaka tang iba ama azüdokshi lendong atalokba ya tesüiba mapang dang nungi khenyongi balaka lir ta mongintemi ashir.



6th Dimapur District Inter Club Badminton Tournament nung category balala nung takok angurtem aser tongti tesemdanger Er. Kasho Chishi, Additional Chief Engineer, Power aser Dimapur Badminton Club ketdangsürtem külemi tangokba noksa ka angur. Iba asayamung ya DBC stadium nung asaya liasü.

BILEMDANGANG
"Rongsen aser tashi agi akhümtsübu majangzükttetsü"